



周官六計課群吏而
皆以廉為本蓋郎官
上應列宿出宰百里
必清介正直不以脂
膏自潤而後才能猷



略皆自此而出所謂
有守者始有為也然
廉以律已尤必惠以
愛人詩不云乎豈弟
君子民之父母豈弟

者和平樂易之謂世
之為廉吏者輒以察
察為明求治太急用
法太苛其不鄰於武
健嚴酷者幾希由是

觀之廉吏固難廉而
兼惠為尤難求之今
日惟吾邑侯李公始
足以當之侯為遼左
甲族從

龍入關祭戟相望登臺閣
建節鉞者指不勝屈
其先大夫陶菴公歷
任清源桂東皆有惠
政邑人崇祀名宦至

今謳思勿輟伯父中
丞公培元先生新膺
簡命移節中州侯之門第
人才並居最勝顧折
節好讀書髫年食餼

鬻序文譽籍甚弱冠
登仕版老成練達游
刃有餘宰楚之蘄春
仁聲惠蹟流傳海內
歲甲午來治吾崑邑

人皆驚喜相告謂即
所聞楚之賢父母也
吾儕自此有慶矣蓋
崑邑地廣而土瘠賦
役繁重民貧日甚侯

初下車惻然憫之先
是為令者惟催科是
急小民賣絲糶穀稍
不及限輒予以大杖
膏血淋漓弗恤也侯

獨倣古蒲鞭遺法改
用小杖薄懲示辱而
已向之驚喜相告者
益交相慶幸甚有感
極涕零者以為數百

年苛政一旦除之候
真具天地父母之心
因交口頌之曰清廉
慈愛製扁額懸諸堂
皇題柱一聯復有聲

絕哀號因留瘦骨之
語此頌聲所自始也
民既愛侯而侯之愛
民益摯所以養民教
民者次第具舉不忍

民之凋敝也為之緩
輸將汰雜費飭漕規
而民力於是乎紓不
忍民之頑梗也為之
宣

聖諭
葺學宮興義塾而民俗於是乎淳不忍民之爭且鬪也為之懲誣告禁拳勇投牒陳訴者輒令里黨解紛

而健訟之風息不忍民之為胥史所擾也事無鉅細皆親自裁斷莫敢上下其手而舞文之弊除不忍老

幼存歿之失所也廣
孝有所育嬰有堂皆
捐俸經畫務垂永久
而掩骼恤孤之澤溥
其餘善政難以縷舉

大抵本於慈祥樂易
其居心也無欲而其
視民也如子即間有
摘發懲一二以警千
百無非所以曲全其

不恐人之心是侯之
用威正以濟其惠而
豈武健嚴酷者所可
同語哉於是向之驚
喜相告者益懽欣鼓

舞各就其所見聞爭
為詩歌以頌之自薦
紳而章縫而韋布無
人而不頌也自城市
而鄉井以及孤村僻

塢無地而不頌也雖
雅俗不同調然其愛
戴禱祝之情均出於
至誠而不容已此之
謂天籟此之謂懿好

同邑汪子欽文昭遠
昊青余子丹舒張子
博如陳子鴻九孫子
于魯劉子翼王哀輯
成編付之剞氏不下

三萬餘言侯何以得
此於民哉余老矣杜
門養疾已無志當世
喜侯之涖止曾隨諸
耆碩後一謁琴堂善

氣迎人如坐光風霽
月中而孫男傳軫以
童穉之年謬邀賞識
方愧未有以頌吾侯
聞通邑之謳吟四起

深為棄梓慶幸不覺
沉疴頓減考之史冊
循吏莫盛於漢然五
袴之謠水衡之咏皆
寥寥數語未有連篇

累牘如崑民之頌吾
侯者侯何以得此於
民哉且吾聞之公侯
之後必復其始似侯
之廉與惠可以宰天


下豈特一邑哉蓋豈
第如侯六計所首推
即日兩臺交薦榮擢
崇階入佐

聖天子昇平之化崑民欲

借恂而無由其將若
之何予是以既為桑梓
梓慶而又轉為桑梓
慮也時

康熙五十四年乙未

仲春治年家眷弟徐
樹穀頓首拜撰



崑山縣李父母仁政徵詩啓

蓋聞卓魯之官異政喧傳於婦孺范元作宰
奇猷上達於京都聆單父之琴聲忽鳴婁水
攬河陽之花色徧植崑岡吏是神仙暫分符
於下邑民之父母將正位於中台爰因伏雉
以興謠用比甘棠之致詠恭惟

配翁李老年父臺西陲才子北海名流毓秀松
山襲登龍之門第鍾祥杏堡綿附鳳之家聲
積功箕子之封豆盧競貴聚族遼陽之域耶

律爭高兄弟聯鑣不數八人荀氏祖孫濟美
何殊四世楊公博物張華手輯千門萬戶耽
書倚相胸藏五典三墳文成金石之篇錦囊
斯在策奏天人之牘仙骨常留簡在

帝心膺茲

寵命牛刀初用吳中發禮樂之矧鳧舄載翔天上
曳星辰之履鼎鼐調羹之手小試烹鮮廟堂
補衮之才先供製錦顧惟僻壤夙號巖疆旱
澇頻年戶鮮中人之產瘡痍載道民懷樂土

之思爰乃布惠施恩爲之理煩治劇痼瘵在
念不辭按戶以諮諏撫字勞心奚翅戴星而
出入解盤根於掌握斷自有餘懸朗鑑於宵
懷明無不達噢咻所至不存姑息之懷奮擊
之餘仍切哀矜之志對嘉賓則止譚風月孰
敢以私意相干見大吏則備悉艱難猶恐或
民瘼上壅返明珠於漲海寧輸洛浦廉名雨
貪泉於石門永矢廣州清節鼠牙雀角不聞
穿屋穿墉社兔城狐自爾革心革面月朔則

講宣

聖諭民行於以維新公餘則訓課士林文教因之
丕振學宮待葺不惜捐金義塾初成即先勒
石以至育嬰堂內澤沛遺孤廣孝阡中仁沾
枯骨甫來期月已綱舉而目張奚俟三年始
風移而俗易絃歌比屋鹿城宛似武城禾黍
盈疇瘠土漸成沃土稽循吏之傳古有其人
聽載道之碑今無可匹爲誌揄揚之實同輸
頌禱之誠伏冀

藝苑鴻儒

詞壇碩彥不靳丹文綠字共投長短之篇并偕
白叟黃童用介岡陵之祝則塗歌巷舞永懷
遺愛於山城而戶祝家尸不止增光於仕譜
矣謹啓

闔邑紳士耆庶公具


鹿城頌聲卷上

隨到隨刊
不拘爵齒

遼陽浴海日鐵嶺侷神丘仰拂長白雲俯瞰
松花流肩巒翼嶂高插天神雞巨蟒相鉤連
霧車風馭天人出山雲飛去海水立手持天
章下五雲鳳毛五色何繽紛丘索典墳堆滿
屋萬卷堂中書盡讀金門射策美少年殿上
旋賡天上曲瑰竒磊落非凡才早看躡足登
星台武城學道宣尼笑牛刀帶向崑岡來訟

王喆生

素巖



庭無人春草長山光水色清簾幌單父堂高
琴日鳴河陽縣古花堪賞慈祥豈弟此心存
一點春陽到處溫剪莠培禾政非猛賣刀買
犢俗還敦顛顛君侯廉且貞何以況之玉壺
冰搏天擊浪有風力行辭枳棘看飛騰朝拂
丹山翥暮宿金華署雲中時聽朝陽聲長記
鳳凰來此處

徐樹穀以約

一行作吏到山城纔及期年政已平饜飫閭

閭無菜色吁唔黨塾有書聲感人真信中牟
異動物胥知子賤誠會見南臺申薦牘

御屏留記使君名

葉 淳淵發

八磚學士姓名芳典司制誥石室藏吾侯毓
秀如圭璋雲階千仞看翱翔喜來茲邑縮銅
章一朝寒谷轉春陽悠然鈴閣凝清香閭闔
藏富盈倉箱沐膏詠苦安井疆樂只君子永
不忘

四境謳吟爲我公。老人何必琢辭工。春回山
郭雙峰翠。露灑花村萬樹紅。調鶴每臨池上
月。撫琴時引竹間風。官無煩劇民無擾。已在
堯天舜日中。

王緝植 建伯

周之楨 辰生

家聲奕奕暫烹鮮。二載崑民得所天。膏雨暗
通婁水曲。仁風高拂玉山巔。神明自燭奸人
膽。正直寧知暮夜錢。定有徵書來

北關。一時父老聽鶯遷。

陳永錫 孝純

附鳳家聲遠。登龍世業垂。策名逢泰運。通籍
佐昌期。照乘圭璋器。追風騏驎姿。烹鮮姑小
試。製錦自相宜。共喜雙鳧集。還看一鶴隨。下
車咨疾苦。比戶起瘡痍。折獄多平反。催科寓
撫綏。霜凝稂莠去。雨潤黍苗滋。報政誇三異。
持躬凜四知。遷喬應不遠。姓氏達

彤墀

一自君侯至。崑城喜氣濃。流民皆復業。老吏
欲歸農。潤似山頭玉。貞如嶺上松。無分頑與
秀。誰不荷陶鎔。

王元臣 聖臣

汪思聰 德達

登龍綿世澤。附鳳振家聲。堂構仍簪組。墳麓
盡旆旌。一行初作宰。百里藉維城。化洽流芳
譽。才高卜遠程。似將餘刃割。不啻小鮮烹。品
共層巒峻。心同止水清。澄懷端物望。肅法體

人情善政隨時舉。弘猷次第行。愛才勤吐握。
折獄矢公平。任值陰霾翳。難遮烈日晴。鯤鵬
千里奮桃李。四郊盈厚澤。沾枯骨深仁。逮棄
嬰鴻材。儲作楫鉅手。待調羹。一代伊周業。千
秋卓魯名。循良聞漢殿。楨幹著周京。應召
彤庭上。崇階列保衡。

徐王夏 允成

滿路歡娛四境同。不分父老與兒童。歲成畢
雨箕風裏。人樂堯天舜日中。鶴影靜依花上

下。琴聲清繞竹西東。河陽單父傳芳躅。峻秩
行看列上公。

何 衷 牧公

半點塵埃不敢侵。懸知夙夜凜官箴。一泓止
水涵明月。百里薰風入素琴。肺石無冤平
國法。口碑有頌感人心。

天書旦晚徵公去。要向
朝堂備楫霖。

陳一鳴 于蕃

楚江有賢侯。翩然泣斯邑。本非百里才。暫為
六月息。法禁未嘗苛。莠民已屏跡。吏鮮追呼
聲。田野安耕織。何處覓桃源。只此真樂國。

徐 駿 堅蕉

山嵐川色曉蒼蒼。對客絃歌白日長。盡擬勤
求為弟子。便憐孤進賞文章。恩沾境內風初
變。道在人間久更香。共遇

聖朝千載運。居然自是漢循良。

劉滄釋清江方千朱慶
餘戎昱黃滔崔鉉盧綸

周學易 岷巖

勲名竹帛重

京華鐵嶺門高將相家七澤和風披橘枳三吳
甘雨潤桑麻調琴雅化潛移俗破柱威名易
觸邪今日政成行報最使君名姓早籠紗

徐樹閔 誠修

尼山昔有言苛政猛於虎窮黎洵可矜感感
靡樂土武健不忍爲姑息亦奚補賢哉李使
君惠澤一何溥碩鼠無食苗哀鴻悉安堵暮
夜絕苞苴塵生甑與釜求之古人中庶幾惟

卓魯

樂土吟十六章

有序

余起霞 丹舒

山號馬鞍城名鹿邑繫人文之輿府亦財
賦之神皋易俗移風端賴循良之彥理煩
治劇允符豈弟之名恭遇

賢侯涖茲巖邑稽譜牒則關隴名家問鼎鍾
則遼河華閥昔年筮仕曾留遺愛於湘江
此日分符喜播恩波于婁水競絳相濟良
法與美意兼施政教維新士習共民風丕

變即古之召父杜母曷以加茲況今之火
烈水濡誰出其右起霞閑居十畝幸戴二
天聽眾口之成碑謹矢音而作頌用伸懿
好略誌仁聲云爾

熙朝雅化繼時雍

天語煌煌降

九重一自賢侯宣

聖諭玉山比戶盡堪封

西城泮壁兆文明丹雘雖施未落成一自賢

侯崇學校宮墻萬仞煥雕楹

華門桑戶詠斯飢迂拙恒遭世俗嗤一自賢

侯培士氣章縫從此得揚眉

呼箕怨斗為民窮惆悵茅簷杼軸空一自賢

侯恤民隱千村禾黍慶年豐

羣黎膏血已無多剜肉醫瘡可奈何一自賢

侯寬賦稅果然撫字寓催科

紛紛案牘積如山蠻觸相持俗自頑一自賢

侯息爭訟琴堂無事吏人間

鹿城公齋卷上
七
飢寒誰復恤元元。莫怪萑苻攘竊繁。一自賢
侯弭寇盜。賣刀買犢遍郊原。

不因雨露廢風霆。力穡須除螾與螟。一自賢
侯傲豪右。城狐市虎總潛形。

誰非赤子忍漠然。三木銀鐺劇可憐。一自賢
侯踈法網。覆盆何幸得瞻天。

經營宅兆最艱難。況遇豪強心膽寒。一自賢
侯懲阻葬松楸。千載護林巒。

賣絲糶穀不勝憂。敝賦何堪額外求。一自賢

侯輕耗贈。爭先輸納又何愁。

三吳飛輓到燕臺。百弊叢生莫可回。一自賢
侯飭漕兌。舳舻銜尾趁冬開。

跣地年少每成羣。報復相尋自昔聞。一自賢
侯禁拳勇。五陵久矣息塵氛。

民間痼疾是樗蒲。恒舞酣歌共嘯呼。一自賢
侯戒游惰。六街無復喝臬盧。

無知黃口忍輕拋。慘聽呱呱隘巷號。一自賢
侯育幼穉。幾多襁褓荷劬勞。

周官計吏重廉能。不潤脂膏在飲冰。一自賢
侯卻饋獻。真同婁水一般澄。

沈兆崧 岳瞻

十千維耦事春耕。桑柘陰中布穀鳴。見說使
君無限好。野人團坐話柴荆。
怪道江鄉戶可封。無邊膏澤慰三農。空山草
木無知識也。覺春來雨露濃。

徐亮采 介軒

勾漏無砂惟酌水。萊蕪有釜久生塵。不知郡

邑臨民者。得似君侯有幾人。

頌言八章 有序

汪安 欽文

恭惟

李老夫子西秦鼎族。北海名賢。仙種盤根共
識。王孫品格神臯。挺秀爭誇公子才華樹。
碩望于龍門。振英聲于

鳳闕恭膺

綸命作宰。崑岡朗朗福星高。映峰頭片玉濃濃
湛露廣滋江畔。百花公自能明。特擅如神

之譽寬以濟猛恒存若保之思既綱舉而
目張遂化行而俗美追呼不擾輸將之力
常舒讞決無欺告訐之風頓息聽絃歌於
四境遥應琴聲培桃李於三春欣依柏影
安才慙吐鳳技拙塗鴉喜坐春風濫與門
墻之列季子試蒙
取優等叨沾化雨敢忘提命之恩敬

賦里言用伸寸悃

一拳挺竒秀山形似馬鞍上有歲寒柏菁蔥
色可餐云是古遺愛至今稱即官誰歟紹芳

躅發祥自三韓

三韓多甲族從龍翊昌期隴西尤熾盛勲名
勒鼎彝我侯鍾閩氣皎皎圭璋姿鴻文杼彩
筆介節媿素絲

素絲夫如何羔羊美五絨分符向荆南膏雨
流七澤翹首盼雙鳧喜向玉山集童叟共歡
迎熙熙遊化日

化日舒且長使君來何暮舉念軫民瘼慈祥
勝叔度催科用蒲鞭解網寬註誤窮黎慶更

生一天敷雨露

雨露雖涵濡務將稂莠除春温兼秋肅鐵面
卻苞苴彊禦何足畏非種在必鋤莠民胥斂
跡比户得安居

安居事耕鑿四野勤農桑既富方可穀絃誦
盈膠庠捐貲葺學舍丹雘何輝煌試登鹿城
眺頓添奎壁光

奎壁臨江城寒芒耀文筆自慚樗櫟安守拙
蓬蒿宅向陽易為春化雨叨嘘植傳經絳帳

中提撕沾教澤

教澤廣且深涓埃曾莫報願言祝岡陵仙籌
添海嶠更願作鹽梅和羹膺

鳳詔集此謳與吟採風須入告

劉澤乾 玉如

郎官印綬喜初加琴鶴攜來水一涯人物隴
西推國士衣冠遼左仰名家披衷將奏當

墀草試手先栽滿縣花自是

聖朝資柱石奎章閣裏待宣麻

葉九齡 大年

馬鞍之山鬱岌堯竒峰矗立凌層霄四顧郊
原安且樂茆簷無復嘆民勞使君世裔出隴
右金貂奕葉推華胄雁門飛將擅無雙麟閣
宏謨真鮮覲更誇累世掌絲綸玉筍聯班紆
紫綬綿綿燕翼長發祥發祥却在遼河陽松
山杏山相對峙鍾靈毓秀成圭璋豐沛從龍
多遠略清源桂東貽甘棠吾侯繩武兼濟美
英年聲譽達巖廊分符初向蘄春道袖拂清

風矢雅操湘江烟雨洞庭波不盡恩膏追杜
召政成指日待鶯遷拭目除書下九天利器
不妨盤錯試雙鳧飛向玉山邊玉山自古稱
劇邑賦重民貧土更瘠撫字催科左右難吏
治所以鮮善術使君游刃却有餘務使羣黎
登衽席下車未久便宜民土俗人情皆熟悉
訟堂雅化著蒲鞭不事刑威胥悅懌初寒暑
雨皆無愁黃童白叟爭歌謳或謂使君清似
水薛澱澄波差可擬或頌使君明似月依稀

身在廣寒闕或愛使君如春風藹然太和樂
融融或戴使君如冬日陽回黍谷疑吹律紛
紛酌酒躋公堂願公介祉壽且臧行看報最
朝天去濟川調鼎

黼座旁不材自分同樗櫟叨庇宇下沐輝光況復
兒曹邀顧盼欣隨父老斟瓊漿馬鞍之山拔
地起仰望去天不盈咫從來祝嘏擬岡陵願
公祿壽均視此

歸玠安蜀

遼海多人傑從龍挺國華平泉留相業供奉
羨名家天半翔鸞翼民間息鼠牙試看婁水
畔何處不栽花

葛起龍履遠

春光好不覺玉山寒但願千村盈積貯敢辭
百計恤凋殘遐邇共騰懽

秋霜肅鳥雀戢深林鐵面爭輝岡上玉冰心
堅却袖中金雅化婉鳴琴

右調望江
南二首

周士元友

洪才再命領文郎善政先施惠澤長衽席意
猶深在疚蒲鞭心更切如傷風和玉阜千村
暖花滿崑封一縣香報道

御屏已久列吳中第一著循良

隨車共喜沐甘霖卓魯賢聲再見今訟少案
常空置牘刑清堂每晝鳴琴一朝令出冰霜
凜百里恩沾雨露深青瑣即今虛左席竚看
指日沛

綸音

葉 澣 蕃久

雙鳧飛下步玉峰頭民情土俗徧諮諏張弛
盡善不競不絀化行俗美萬姓歌謳 使君
碩望自昔無儔分符此地暫勾留和風甘雨
普灑田疇家尸戶祝海屋添籌 右調贊
成功

徐雲衢 恭士

凌雲黃鶴志百里負雄才威望驚豪右恩光
遍草萊一時報政最四野頌聲來玉阜繁佳
氣葱葱接上台

西陲間氣鍾名賢爰借牛刀試小鮮堂上琴
鳴民有父城頭花發吏稱仙青田紅女三時
餉白屋黃童盡日眠鉛槧競傳新政美敢將
下里續瑤篇

俞廷棟 永懷

汪 雯 昊青

從龍家世出名流小試烹鮮令古婁先後樊
楊堪濟美久知仕學已兼優樊楊兩侯皆
崑邑賢令
節比羔羊詠素絲故人來謁敢懷私居官本

合清如水廉吏真非俗吏爲

翦暴鋤奸事屢經心如明鏡掛秦廷由他鬼
膽都驚破那有山魃不現形
經營首事素王宮文教欽承

聖主崇從此人人勤仰止萬年木鐸振羣蒙

鄉賢名宦植綱常祠宇長留學舍傍不是使
君修廢墜四時誰與薦馨香
村野何知禮與詩於今鄉塾有經師不妨脩
脯分清俸併望成人解問奇

士讀農耕日就貧牧豬奴戲自災身下車第
一申嚴禁無復呼盧喝采人

拳勇從來職亂階市兒相率學椎埋自經迅
擊雷霆後任是無良也畏懷

東南民力久難支忍見醫瘡剜肉時甘學陽
城勞且拙閭閻不致竭膏脂

紛紛駱齒暴荒郊風雨深宵有鬼號廣孝阡
頭教掩却九原都得被恩膏

不忍呱呱泣路傍嬰兒無處覓耶娘好生一

念同天地盡荷神君免折殤

元禮龍門不易登蒹葭敢倚玉壺冰公餘偏
愛勤延攬寒峻中多耐久朋

劉植敬 緩人

稼書陸先生昔為膠邑令皎然冰雪姿鑿物

明如鏡家無負郭田到官貧愈甚 膠人頌云有官
貧過無官日去

任榮於到任時
至今猶傳誦 所以稱名臣朝野胥愛敬使君真

其儔廉介本天性不大色與聲矢念在民命
雙袖揚清風孤標直且勁以擬平湖公未知

孰爲勝

秦檝傳舟

威惠如仙令應從天上來此時膺百里異日
位三台勲業文饒裔詞華太白才烹鮮姑小
試游刃自優哉

陳于臯鶴九

君心如明鏡羣物無遁形君志如寒泉一泓
涵清馨鏡爲塵所翳君心長皎潔泉爲泥所
滓君志自澄澈鳴琴澹無爲公庭花木新野

老擊壤歌熙熙遊陽春相與躋君堂稱觥介
眉壽願君壽無疆榮名著宇宙

汪察昭遠

聖主重民命宵旰咨疾苦慎選郡守司寄任若肱
股東吳財賦區尤欲用恩撫隴西有偉彥稽
拜受印組學優才更富循良邁往古敢附輿
人後信筆略具數白山勢插天蒼翠絕塵土
水有松花江澄碧宛銀浦靈秀鍾異人吾侯
爲砥柱六絕翰林家列榜號龍虎開國盟河

山遼陽多接武三策奏天人才思江都伍祖
訓多官箴箕裘傳仕譜仙鳧涖崑岡早沐隨
車雨堅矢冰蘖心一介真不取火烈水濡弱
終與民性迕良法持其平百里獲安堵保障
先繭絲凡民無吏侮五官常並用案牘任傍
午剖斷瞬息間何曾歎靡盬況復振斯文黷
序飾棟宇所在建義塾村野知訓誥深仁襁
褁周厚澤泉壤普豚魚不忍欺鸞鳳欲翔舞
張弛悉善政未易備覲縷祇言行仁人從來

邀天祐治成報

天子何異卓與魯祿位冠公卿晉秩留
天府

徐萊 斑怡

聖主垂裳治化成中外師濟羅羣英大法小廉佐
昇平猗歟夫子應運生青蓮詞賦錦囊盈分
符來涖西鹿城父老攜杖兒童迎與民休息
靡有爭愛養黎元如保嬰桑田夙駕隴上行
瞻蒲望杏課春耕釐奸剔弊公且明片言折

獄協輿情竚聽四境謳歌聲轉眼報最上
帝京三槐九棘慶遷鶯

劉漢貞 曙東

嚴凝氣逼就枯朽陽和倏變霜條桺阿誰調
燮喚春回遼海雙鳧臨玉阜郊田麥秀擁銀
濤萬樹桃花飛綵綬宰官廉明民乂康人人
頌禱碑盈口

朱 永觀成

卓爾循良吏誰如李鄴侯公從廉裏得威自

愛中留無復悲絲穀惟聞買犢牛化行期月
可不數古中牟

輦轂乍聞名喧傳孝友聲持衡推砥柱製錦
涖江城范甌塵常滿庖刀窾自迎四郊歌孔
邇聲譽達

神京

王緝徵 次鄭

填詞宜譜清平樂度曲齊賡作息歌不是使
君膏澤沛那能徧野頌聲多

吳中煩劇地作宰自來難茹蘖知心苦施蒲
識網寬康莊將展驥海澨偶棲鸞峻德知何
極峩峩並馬鞍

陳于達 鴻九

隴西家世本赫奕代產賢豪聲籍籍才子風
從賦日高功臣望自凌烟積白山綠水傳綿
綿列戟鳴鐘高第宅從龍附鳳開國來人物
於今尤信昔吾侯之生間氣鍾遠繩祖武布
祖澤百里雷封筮仕初何妨暫駐雙鳧舄下

車旬日稱神明破妖縛虎顯竒畫政平訟息
獄無冤案上風霜秉三尺門外不聞催科聲
憂勤百計保蒼赤振興禮樂教詩書黌宮鄉
塾羅典籍栽培士類振貧寒閔叔猪肝鄧子
麥雲漢詩成蝗不災石壕歌作地不坼鸞將
集解奏和音雉已馴林非鍛翮荀令香煙滿
袖攜河陽花果盈車擲玉山之陽婁水濱欲
呼父母人盡獲洵屬循良第一人壑倒紛紛
萬千百明年歸佐

聖天子何異唐虞資伯益

李本伯益後

李炳石

琴聲單父此重彈一曲南薰欲和難有事盡
將無事了民心只作我心看梅開官閣春盈
署鶴立公庭月滿闌此日循良誰作傳須知
清氣襲人寒

劉滋桂 瑞升

頓覺山城化日舒花封暫駐使君車鄧侯已
慰南天望盧史應題北闕書堂下鶴鳴風月

靜階前牙拱社城虛只今報最聞
當宁臺省看膺不次除

葛允中 虞吉

即官躋位應星辰小試巖疆似有神槁壤忽
沾車足雨寒條漸逗隴頭春調來雅奏琴如
窓展出清光鏡是秦幸荷栽培方慰望
徵書又恐出
楓宸

柴奕孫 問宏

威鳳丹霄振羽翰相逢仕路盡彈冠恩膏不
惜沾窮壤疾苦都能告長官濁酒載從鈴閣
飲清琴攜向印床彈只今徧起輿人誦爲政
風流定不刊

鄴侯門第重西陲來暮歌成有口碑化雨忽
從婁水降慈雲偏傍玉山垂居官有本箴三
字潔已無私凜四知待應

壘書歸

帝闕他年勲業並皐夔

